

乾隆杭州府志

杭州府志卷七十八

名宦五

明下

王興福隨州人知杭州時杭初附人心未安興福善撫輯民甚德之秩滿當遷郡人遮道攀留興福諭遣之曰非余能惠父老父老善守法耳太祖嘉之擢吏部尚書

明史王宗顯傳

劉文洪武初知杭州時百事草創郡邑政繁而仁和建治興賢坊錢塘在紀家橋去府稍遠聲息不相聞文建議遷于郡治左右旦夕咨啓出入追隨至今便之

萬歷舊志

王德宣江西德興人洪武五年知杭州約已以廉字民以

義崇儒重道作興士類捐俸置書六百二十七冊藏于府

學崇文閣以畀士子習讀

成化舊志

阮友竹或曰竹友當塗人剛介有守洪武十五年春詔聘天下賢士夏六月有旨及友竹門友竹卽日戒道入覲遂自布衣拜四品官知杭州府旣受命不俟驕從以一童自隨之官視事踰月自念以一介士受國家專城之寄非善政何以爲報乃闢治後地爲思政堂自書其額揭兩楹間凡政有未逮者輒于此思之天台徐一夔爲之記

萬曆舊志

虞謙字伯益金壇人由國子生任杭州知府嚴明果毅下吏莫敢爲奸興賢育才以正俗秉禮爲先士知勵行嘗建

議江南僧道自先朝占田至數百頃冒免征徭貧民無田
反爲徭役所困請爲限制每僧道止許四十畝餘悉以業
貧民時雖不果施行識者是之後官仁宗朝以都御史督
兩浙糧運先是糧運至北京者最艱徐州者次之兩淮南
京者又次之唯存留者爲善每派運時奸民往往賄求近
地人歎不公謙命一准貧富以均遠近其富而糧輕者至
北京餘悉以次降民德之謙爲人美儀觀風采凝重善計
天下事在廷諸朝貴皆服其能言工于聲詩仕終大理寺

卿萬歷舊志

劉福福建人永樂間知杭州寬仁簡易政切爲民恥俗吏

煩苛以清淨慈和爲治催科不擾民甚德之及以憂去惟書篋衣囊一肩聞訃卽時就道人無知者

萬歷舊志

盧玉潤江西新淦人由吏員歷杭州知府勤慎愛民刑不

苛暴吏服其明陞廣東叅政

成化舊志

胡勉字志學鹽城人永樂十一年擢杭州知府精勤敏決抑豪右摧奸宄吏不得肆至窮閭細甿保愛矜恤惟恐傷之勸學興禮敦崇文儒士風丕振以憂去

萬歷舊志

陳復字鼎初懷安人永樂進士由戶部主事知杭州廉靜無私獄訟大省日端坐堂皇與曹掾講讀律令而已遭喪部民乞留詔起復未幾卒按察使軒輓倡僚屬助之乃克

欽吏民相率致賻其子盡却之稱貸歸

明史軒
輓傳

張隆雲南建水人正統中由監生任杭州府知事蔚有賢聲景泰元年以言者薦擢本府通判尋進知府患杭俗侈汰躬爲節儉以矯正之身所服御僅同寒素靡俗爲之少變厥俗吏苛急政尚寬簡有古循良風以母喪去行李蕭然人服其介

萬歷
舊志

張禧字公錫靈璧人景泰甲戌進士知杭州府值歲饑設法賑濟全活六萬餘戶晉湖廣叅政未行卒杭人祠之

舊志

胡濬字淵源鉛山人登進士天順改元知杭州府躬行屬邑察民利病時值久旱行次新城見田疇乏水灌漑濬登

山周視見五里之外有水可引爲濟召其主諭以引水開渠田遂得水是歲大熟民感其惠名渠曰胡公渠次富陽田乏水猶新城相其地上可引山泉下可引江水乃召民置脣一所而時其蓄洩民亦名其脣曰胡公脣新城有許遠廟錢塘有白居易蘇軾林逋三賢祠歲久傾圯倡率修建以聳士民之瞻仰

浙江通志

陳讓字德光大河衛人由進士知杭州府息嚚訟均賦役抑驕侈境內大治時海勢漸內徙逼海寧城羣策莫能治乃請去城一里支河築內堤延袤十里以寬制猛不與海爭利海果至堤而止省城奸人多托權勢家避匿糧差悉

查覈歸正無敢怙終者

浙江通志

楊孟瑛字溫甫鄆都人成化進士宏治十五年知杭州當事敢任如奏安溪竹木關却福建進貢之借艘于杭城免

旱災糧七萬石定水馬驛夫之徵皆便民美政其浚復西湖俾水有蓄洩利益下塘諸田尤溥

萬歷舊志

梁材字大用南京金吾衛人宏治進士正德初改御史出爲嘉興知府調杭州田租例參差材爲酌輕重立畫一之法遷浙江右參政進按察使鎮守中官畢真與宸濠通將舉城應之材與巡按張縉劫持真奪其兵衛尋以憂去史

本傳

留志淑字克全晉江人宏治進士正德中來守杭州詰奸
理枉厚本節浮平物估均糧役民甚德之時鎮守中貴恣
橫羽翼鴟張吏莫敢問志淑獨先按治裁之以法畢真者
宸濠逆黨也方江右兵起真坐府召諸司計事御史縉旣
以計挫之諸司念當一往見志淑陳謀先伏兵真府外諸
司乃入旣出志淑入真厲聲曰太守圖我反乎志淑曰無
是也公府中徒御太多爲此洶洶耳因目左右白諸司諸
司盡入志淑卽上堂作白事狀因執真手真不得已脫衆因
請出諸所不籍之人以釋衆疑真倉卒不得已呼衆出出
則兵盡執之以屬吏俄與真周行府中見諸兵器詰曰藏

此將何爲真不能答踰月江右平真亦就逮

萬歷舊志

呂夔字祖邦永豐人正德間知杭州府惠愛旁治吏民安

之迨歸攀輿泣而送者塞路

萬歷舊志

李冕字瑞甫章邱人嘉靖進士知杭州府寬恕簡靜雖無

赫赫名而操持潔清皭然不滓足稱廉平太守

萬歷舊志

婁志德字存仁項城人正德進士嘉靖中知杭州罷厨傳

省饋遺以佐百姓志操廉潔視一錢尺帛若將浼焉爲郡

六年始終一節

舊志

方岑字伯高江都人嘉靖丙戌進士出知杭州府先是海
寧令某引用巨猾數人恣營奸利已乃逮諸巨猾下獄夜

使人殺之以滅口事發岑按驗有狀庭笞逐之而令爲按
臣私人遂爲所中傷免官著有竹素齋集

江南通志

陳一貫字邦通福清人嘉靖己丑進士歷任杭州知府杭

大饑一貫抗疏捄荒得減租稅杭人賴以全活時徽州亦

饑勢家求糴於杭一貫答以徽民可生杭民不可死寧棄

官不開糴坐謫撫州同知乞歸著書自樂角巾徒步囊無

一錢年八十一卒

福建通志

陳仕賢字邦憲福清人嘉靖進士知杭州府清操愈勵衣
不重綵食無兼味務瘠已以肥百姓水旱祈禱輒效當官
不務操切而事簡政平吏民樂其不煩

浙江通志

吳自新字伯恒江寧人隆慶戊辰進士授都水主事擢守
杭州杭俗汰侈以廉約鎮之勾檢織府金歲省數千遷兵
備副使歷左右布政皆在浙勞心疆事歷年既久凡民間

風尚吏治臧否毫不可欺屬邑晏然擢河南巡撫陞南刑

部侍郎卒

江南通志

唐際盛字士瑩莆田人萬曆中知杭州時治中別駕及令
長多不自檢際盛以威稜接御之爲政馭吏者什九馭民
纔一二誦聲徧野陞杭嘉湖道錢令以妄取市物民不從
拘于獄將夜斃之適際盛入省市民歡呼曰得重生矣令

聞解印綬去

舊浙江通志

胡士鼇字爾潛詔安人萬歷丁丑進士爲計部郎持節賑
畿南諸郡出守武林以忤當道奪職歷登州同知遷青州
守福建通志

姚之蘭字汝芳桐城人萬歷中由進士知杭州丰裁卓然
訟無留獄接士以禮煦然如坐春風中一時稱爲冰鑑去
之日郡人立德馨祠于吳山及西湖舊浙江通志

石萬程湘潭人天啓進士知杭州值廷鞫海寧吳中彥父
子事執法甚堅中彥窘急入賄萬程峻却吳竟抵法陞溫
處兵備副使湖廣通志

龐承寵字星易吳江人天啓間知杭州和易近人坐堂斷

事或民懦氣懾口格格不能吐承寵令其盡言無畏或奸宄巧詆喋利言勝人則整威嚴以臨之嘗言周禮五聽氣聽爲微正欲聽其氣耳有兄弟訟者髮垂白承寵詰曰

異母弟昆耶對曰一父之子也承寵曰今訟當非汝兩人

心必中婦言迺至此兩人驚悔皆叩頭謝罪而去舊浙江通志

岳虞巒武進人崇正間知杭州善聽訟不事鈎距而事必得情及去郡有坐獄于庭者稍不得理卽曰使岳俟在當不至此舊浙江通志

按舊志巒作巒未詳孰是

段信三原人正統丙辰進士任杭州府推官明習憲章精

聽斷持法不務深文而奸宄卒無縱舍召拜御史仕至僉都御史浙江通志

楊希孟耀州人永樂初任杭州府同知勤幹廉能務修職業公平敬慎愛養民力不敢重勞以妨本務有大興作必爲立法均之一時稱郡佐者以希孟爲稱首萬歷舊志

侯昌魚臺人正統元年由監生授杭州府同知貯米穀以備賑濟修陂塘以備旱澇民賴之陞處州知府成化舊志

馬偉瀛海人景泰間以舉人爲杭州府同知爲政簡易尚文雅修岳武穆墓廟奏與廟額曰忠烈加一祭以春秋仲月行事陞處州知府成化舊志

月行事陞處州知府

成化舊志

劉元瀚新貴人由鄉薦爲杭州府同知寧邑海塘隨築隨圮三臺咸臨相視屬元瀚董其役以庚午四月受事擇能吏五六人分督之時時躬巡海上課勤惰爲殿最其法以

木櫃盛石鱗次櫛比復用木椿夾持內外工稍就緒七月

初海水復溢不爲民害

海寧縣志

楊卓字自立泰和人洪武四年進士授吏部主事踰年改杭州府通判有兄弟爭田者累歲不決卓至垂涕開諭遂罷爭卓精吏事吏不能欺而治平恕民悅服焉

明史王觀傳

易輓高安人永樂九年爲杭州府通判廉幹勤敏政理公平倅郡數年鋤強革弊民爲謠曰易打鬼清如水擢高州

知州

浙江通志

董葵陽威海衛人任杭州通判崇正中署富陽篆凡徵收條賦令民自函投匱吏胥不得上下其手知里差擾民盡革去其法檄本人自催間有三催後期者始發役追之吏不得額外立加耗名由是民懷其惠輸納恐後舊浙江通志

黃從律爲杭州通判浙西水災發賑銀三千餘又准各府錢糧蠲停改折留抵賑荒佐郡守分賑足徧村聚親自散給民賴以全其他發奸擿伏尤不勝計舊浙江通志

熊以淵靖安人初任蕭山縣丞以廉能薦陞杭州府通判專治農務躬歷田野率民具畚鍤築堤滄河濬導溝洫堤

塗之傍樹以桑柳俾水旱有備民蒙其利秩滿陞泰安州

知州

成化舊志

賴聖祖字震南長汀人天啓間任杭州司獄尋陞四川鹽

井司大使時張獻忠陷四川罵賊不屈而死

福建通志

徐大興洪武初累功授元帥從李文忠援新城克桐廬富陽卽取杭州陞仁和衛指揮僉事屢從征伐所向有功

舊志

陳善道景陵人杭州前衛指揮僉事少以諸生嗣世官中武舉官把總時寇起海上巡撫命善道往討倉卒率兵走七十里戰赭山下敗死事聞詔恤其家仍立祠祀之

舊志

黃信中餘干人建文中授錢塘知縣九載課最當遷部民

相率訴于上官乞再任帝嘉之卽擢信中杭州知府俾得

治其故縣

明史循吏傳

葉宗人字宗行華亭人永樂中尚書夏原吉治水以諸生荐授錢塘知縣縣爲浙江省會徭重豪有力往往構黠吏得財役貧民宗人令民自占甲乙書于冊以次簽役役乃均嘗視事有蛇升階若有所訴宗人曰爾有冤乎吾爲爾理蛇卽出遣隸尾之入餅肆爐下發之得僵屍蓋肆主殺而瘞之也又常行江中有死人挂舟艤推問則里無賴子所沉者遂俱伏法邑民以爲神按察使周新廉介吏也尤重宗人一日伺宗人出潛入其室見厨中惟銀魚腊一裹

新歎息攜少許去明日召宗人共食飲至醉用儀仗導之

歸時呼爲錢塘一葉清

明史本傳

鄭彥譽湖廣臨武人以賢良方正舉正統間錢塘知縣心存惠愛政尚寬平且惓惓以興學爲務薦拜按察司僉事

舊志

余本剗字應明江夏人宏治五年以舉人知錢塘縣有治績爲時所稱歟人張良寓杭爲人所誣當具獄爲昭雪之

良深感德繪像以示子孫

浙江通志

承天秀字鍾之靖江人正德丁卯鄉舉授錢塘知縣歷任九載會織造內監畢真有逆謀約翌日黎明發兵時漏下

二鼓天秀偵得其實乘夜集兵城上張燈發砲真驚怒聚衆鼓譟見守禦已嚴卽解散事聞置真于法

常州府志

李承式字敬直大同人嘉靖末由進士知錢塘縣時值災

祲救拯不遺餘力有大徵發咄嗟立辦

錢塘縣志

姜名廣安州人萬歷初令錢塘剖決若神接縉紳以禮一

千以私辭色俱厲均稱清賦立鄉約置義倉百廢具舉

舊浙

江通志

朱光祚江夏人萬歷乙未進士令錢塘攝仁和才氣睿敏遇事片言立斷又得以其餘接賢士大夫課諸生月有試試文夕入晨出殿最不爽催徵示以限有先限及限輸者

令無造比鄉民安堵

仁和縣志

轟心湯新淦人萬歷中令錢塘事至卽決庭無留牘與臺使者言利害可否必得請乃已適南湖水溢錢邑欽賢諸鄉被災最烈于是建化灣塘次築閘次議濬南湖次建捍

江塘民思其德

臨安縣志

沈匡濟字方平青浦人天啓進士授錢塘令時勢家侵佔西湖爲園田悉釐正之歷官山東提學副使初在浙分校甲子鄉試烏程凌義渠其所取士也

江南通志

鄖明昌湖廣漢陽人令錢塘沉毅寡言笑與客就坐嘗三易茶賓主不交一言而退先是編役蠹胥爲奸以貧下充

見年一月三受笞而豪富者不納如故明昌每一戶給單
一凡丁若干田地蕩若干銀若干分爲四限納一限則截
單一角謂之截角單不納者執單聽比掾胥豪猾之弊一

清舊浙江通志

顧咸建字漢石崑山人崇正進士授錢塘知縣甫之官京
師報陷人情洶洶咸建戢奸宄嚴警備一以靜鎮爲務巡
按御史彭遇颺以貪殘激變上下大擾賴咸建調護事寧
而民免株連及南都失守鎮江守將鄭彩等率衆還閩緣
道劫掠杭州士民以爲憂咸建出私財迎犒乃歛咸去無
何馬士英自南京擁兵至士民益懼巡撫張秉貞遣咸建

力請駐軍城外城中得不擾時監司及郡邑長吏多逋竄
咸建散遣其妻子獨守官不去及見殺懸首城上方盛暑
一蠅不集時人異之

浙江通志

韶護陝西岐山人洪武三十一年任仁和居官能幹爲政
不苛獄無留滯吏民畏而愛之

嘉靖仁和縣志

許璞字玉卿鳳翔人發解舉首正統六年薦陞仁和縣公
平廉慎輕徭薄歛卒官貧無以歛民爭賄之

嘉靖仁和縣志

梁萬鍾字天錫溫江人成化進士知仁和縣興利舉廢斷
獄明慎冤滯者多所平反擢知杭州浚西湖以瀦水使旱
澇有儲新岳武穆王祠政尚寬簡陞兩浙鹽運司

仁和縣志

陳榮字仲仁上元人成化舉人知仁和縣仁和財賦重困
且附省城榮戴星出入案無停判篤厚愛民不以毀譽禍
福置慮歲旱請減民租什五監司曰二亦足矣榮曰災應

如此奈何厲民卒守前議方冬發民築海堤民多凍死榮
曰邀遠利以蹙近害民何以堪遂罷役踰年政成乃興庠
序之教建社學十許所禮教日振御史歲巡罔不旌禮之

浙江
通志

李義壯字稚夫南海人嘉靖癸未進士知仁和縣前令以
詬誤去丞署邑久吏緣爲奸義壯至勾檢畧盡繩之以法
下吏抱案牘至前脅息莫敢仰視片言折獄老吏勿如不

爲峭刻而亦無縱舍請託不行歲編丁役皆親自訂定胥吏不得與凡奉臺省勘議事關民瘼者務在惠利小民恥從順以希知遇士大夫以禮然憚其方嚴無敢以私干之以是獄訟無枉終右僉都御史

仁和縣志

黃正色字士尚無錫人嘉靖進士除仁和知縣果敢有大節臨事立斷無所屈撓而中懷樂易民愛敬之呼之爲父盈庭執競徐以溫言省諭狡僞者率多愴悔以憂去後官

御史

仁和縣志

按黃正色仁和志作江陰人今據明史改正

劉洪謨南昌人萬歷乙未進士令仁和士民奉法聽約束

無敢怠故事撫軍牙旗及繩歲一易曹吏以告洪謨曰吾且視之曰旗與繩俱未敗浣而新之可也稅事起一日市民鼓噪欲犯中貴人幾釀大變洪謨輕車出諭以利害散去中貴人亦德之每事就折斷焉仁和縣志

樊良樞字致虛江西進賢人萬歷甲辰進士令仁和與人推誠開肺腑無所隱徵比以大義勸之不事笞朴民亦感其悃愞爭先輸納歷遷浙江提學以不作魏忠賢祠碑解

印綬歸仁和

喬時敏字古岡上海人庚戌進士補仁和令其仁心似中牟其詰奸似朝歌其強項不畏貴戚似洛陽令在仁邑五

年民愛敬如父母肖生像于西湖上陸宣公祠側碧石頌

之縣志

仁和

周宗建字季侯吳江人萬歷進士令仁和十年一審役主者多不平譁然爭于廷宗建適蒞事父老竊相語曰侯仁且廉譽言徒自誇張耳盍議定而後入衆皆曰諾及入宗建語曰役均乎皆應曰均第二里第三里皆對如前宗建喜顧掾醞酒插父老花旌之其後此者役舛錯未善也顧間日而議定及期盡三百餘里役無不均者擢拜福建道御史忤魏忠賢詔獄瘐死崇正初贈太僕寺少卿謚忠烈

仁和
縣志

王永吉高郵人乙丑進士令仁和邑歲輸糧十餘萬石舊制倉廩八十間不足貯永吉乃捐俸及贖錢增建倉廩其數與縣里之數等每里各分其一又計廩之高下廣狹以較斛之大小乘除爲制墨綫于廩內而署其外大書至此計幾十石至此計幾百石每比限實其墨層累而上一見較然省會有八角港舊通海南北商賈賴以避颶風奸人私爲壘斷築壩阻之以致商舶多覆溺永吉闢其壩使商賈進避計吏以卓異聞舊志

方直福建建安人永樂十六年由國子生選知海寧縣寬而不弛忠信敏練治聲翕然擢御史去萬歷舊志

孫昊字曰明南陵人少以文學名督學御史戴珊稱六才

子以昊爲首成化丁酉鄉舉知海寧縣築堤捍海民賴以

安江南通志

何俊字宅卿南陽人嘉靖二年以進士知海寧縣閏三年
簡樸恬諒政達聲流巡按御史知俊之能檄所司備禮獎
之以風勵長民者清修之譽特起俊不意滿色喜也

海寧州新志

志

嚴寬丹徒人嘉靖十二年由進士任海寧縣時因捍海塘
之役建議準海鹽例歲儲均徭役銀以備修築自後寧邑
設海塘夫一百五年儲役銀三百兩著爲令自寬始也

海寧
縣志

楊挺高字叔謙金鄉人嘉靖中由進士知海寧廉貞絕俗
甫期丁艱歸士民追送者如歸市服除補平湖三年入觀
有天下清官楊挺高之目仕至藩司

海寧州
新志

鄭伯興嘉靖年知海寧縣倭寇犯海徽監司欲以糧勸民
伯興持不可曰貧民尚逋常賦欲以兵授民又持不可曰
不忍驅白徒以膏倭寇至以利害怵之伯興不爲動邑人
得安

浙江
通志

蔡完號古亭又號松野麻城人嘉靖年以舉人知海寧值
倭亂增城浚濠邑賴以安暇日聘名儒增修邑志發凡起

例綱目燦然後陞同知去

海寧州新志

李維字國張蒙城人嘉靖年由進士任海寧志尚清肅苞苴不行一勢家兒饋午節儀先問胥吏探其衙中急需物一一具進維覺之正色謝曰吾輩相與豈宜以窺探爲精神耶其人汗顏退他事方嚴類如此

海寧州新志

殷登瀛字子登宣城人嘉靖進士知海寧縣期月宿逋盡清案無停牘擢戶曹榷關作浴心亭以自况仕終金華府所至有清譽

江南通志

許天贈黟縣人由進士知海寧縣隆慶元年奉檄丈田天贈精勾股法于弓步中照訖通攤徵額無虧而官田官地

偏枯之累坍江空號虧田之患及奸胥那移飛灑之弊一時盡剔其法有原造丈量冊有魚鱗冊有原造業主冊有歸戶實徵冊其丈田有鈔弓有木弓有竹箇弓鈔弓以鄉尺六尺爲準木弓以鈔弓二弓爲準田之短者用之箇弓以鈔弓二十弓爲準田之闊而長者用之以田準稅以稅

乘田閩邑便之

海寧縣志

蘇湖太和人萬歷四年任海寧令時海鹽海嘯寧塘盡圮漂廬舍溺人無筭巡撫徐栻議修築而難其人湖適至卽委之湖定議擇本縣官民之廉幹者令各認丈尺編字號酌難易爲夏益尅期興作懸賞格以課督之三月而後竣

事半工倍焉

海寧縣志

陳楚產字悅道麻城人家貧力學晚歲登第萬歷年知海寧縣洞悉民隱禮諸生必于賓館談說文藝一語及私卽正色謝之御吏嚴不少貸以是噴有怨言會丁艱去歲大祲上發帑賑饑當事輒乾沒人鮮得實惠于是向怨者皆相顧竊嘆曰陳侯在當不至是公論自此乃定後仕至太

僕寺卿

海寧州新志

王嘉賓字庭實來安人萬歷丙戌進士令海寧築海塘以禦海患乙未內召右贛以逋難之民德公爭輸如額得入

朝遷御史

海寧州新志

林恭章字爾肅莆田人萬歷進士知海寧縣邑苦解糧大戶營脫輒令小戶當之恭章議津帖法令民計畝入錢役遂得均歷湖廣右布政使

福建通志

謝紹芳字劍緒福建甌寧人爲海寧令設誠力行與民休息遇誣命者應時剖析溝瀆無冤民几案無留牘所全活不可勝數後擢南臺御史

海寧縣志

林奎字子野福清人崇正年進士知海寧縣有異政邑有妖人能緣壁飛簷沉水中一二日以劍術惑衆聚至千人聞都城之變將舉事空聲言行鄉約驟至其地捕殺之邑人大悅南都破守城卒乘機乞餉一年奎以非制持不與

卒遂環署而譟空出坐堂上諭之卒益肆空不爲動厲聲
曰吾一日在官守朝廷一日法若等何爲者衆知不可挾
乃跪而哀墮空猶不可則請給三月空曰固知若輩窮乏

然何可聚衆要挾必得爲首罪之乃可衆不得已共舉三

人庭責之而後如其請空後爲員外郎戰歿于福寧

浙江通志

楊敬麻城人洪武初知富陽縣時初闢草萊開縣治建置

殷繁敬行政寬猛得宜民感其惠

舊志

孟斌洪武十年任富陽縣修廣學校平易臨民時稱爲賢

令

富陽縣志

陶觀永樂年任富陽縣留心教育修建學宮

富陽縣志

吳堂樂平人永樂進士宣德九年知富陽宿弊盡釐庭稀訟牒嘗繪楊震却金故事于退食所以自勵與部使者不合解秩去父老詣闈乞留復職一邑驩呼如再覩父母在

任築春江隄復東觀山關奏減白綿貢修飭庠校建譙樓廣城隍廟新子陵祠修富春志此政績之最著者秩滿民

立祠名曰報功

富陽縣志

鄧淮福建人宏治二年來知富陽縣有惠政後入祀本縣名宦祠

萬

陳伯諒字執之福清人正德戊辰進士知富陽縣嚴抑豪強痛繩奸猾廉仁兼著以最入爲監察御史

福建通志

方舟號柳溪婺源人嘉靖九年進士知富陽能以文學飾

吏治修學宮建觀山鐘樓修縣志

富陽縣志

王惟孝應天上元人嘉靖中由鄉舉知富陽初蒞邑卽以賑民饑困白于上官按使張景大賢之報可在任敏幹慈祥且砥清操以卓異徵爲御史

舊志

桂軌號信齋安仁人嘉靖年以舉人知富陽縣明察能斷務以振作飭靡人咸敬畏之建置縣城設法區處計丁均辦刻日成功

富陽縣志

施陽得號中川無錫人嘉靖年知富陽縣愛民禮士事舉政成造恩波橋易木爲石闕整壯固易名永濟

富陽縣志

李啓湘陰人一作龍陽人由鄉舉萬歷年任富陽縣坦直

豈弟視民如家人父子待賦長有禮不加扑扶人謂之李老伯遇僧尼犯姦者輒加懲勸以畜髮婚配曰少一僧尼

卽多一農民也有去思碑

富陽縣志

管九臯字鶴野廣德人萬歷年以舉人知富陽縣催科不擾民自樂輸斷獄片言豪強歛迹修學宮勸民樹植修築隄堰皆利及百年擢監察御史

富陽縣志

季概六合人萬歷二十二年由貢生知富陽縣長厚有幹才多行善政崇學校疏鹽引革稅弊民蒙其利

富陽縣志

任才欽晉江人萬歷年由鄉舉知富陽縣釐剔賦稅宿弊

敦崇名教闢說約堂與諸生講道課業邑中節孝者旌禮之以勵風俗

浙江通志

王橋字榮子夷陵州人萬歷年知富陽縣明敏練達重士體抑豪強徵輸有方胥吏懾服重造學宮修城隍廟清理沙地號能吏歷貴州按察使

富陽縣志

楊春枝雲南人萬歷年以舉人知富陽縣持大體練達有斷吏不敢欺修城池治街道政聲大著

富陽縣志

杜斗愚字慕之清豐人以舉人知富陽縣慈和豈弟禮士恤民有循吏風坐姻家相連去任士論惜之

富陽縣志

梁初溧陽人洪武七年知餘杭縣時邑初附民尚逃匿邑

里荒蕪初多方導民開墾曠土盡闢虎白晝傷人禱于城隍祠患遂息撫字有法民樂耕桑數年鷄犬相聞井邑蕃殖且孜孜興飭學校人士稱之

萬歷舊志

林源長樂人永樂年知餘杭縣首興學校修大成殿造明倫堂朔望勸課生徒咸知感勵賦役均平催科不擾凡部使者行縣詢吏賢否至林令皆以公勤廉敏對

浙江通志

黃鑫星子人正統三年由儒士舉任餘杭縣知縣居政清勤多扶植善良不懼豪右故民寃抑得伸後解任家居民多懷土物以遺之其感民如此

萬歷舊志

張敏蠡縣人天順五年由舉人知餘杭縣事惠庇善弱威

制豪強居二年事治民安治績稱最以母憂去士大夫作

青天歌以送之

浙江通志

鄭軾字式之永豐人成化年由進士知餘杭清白自持下車卽詢訪民情釐革夙弊夏秋二稅皆預與民爲期鄉無吏跡而輸納者嘗先他邑母老隨任以疾卒棺斂不備有以賻奠饋者却之不携一物以行民無老幼皆流涕後陞

監察御史

浙江通志

冉繼志字孝隆蠡縣人由進士宏治七年知餘杭聰察過人獄無留滯居三年能譽旁達陞都察院都事

餘杭縣志

彭辨之字問夫霍山人正德戊辰進士知餘杭縣時逆瑾

舞權浙省苦于織造力裁之邑得不擾擢工部主事出補

饒州府進山東叅政

舊志

喻江字朝之滕縣人正德年知餘杭性廉介樂易愛人至

有利害關一邑則果于有爲毅然無所畏憚葺孔子廟庭

舊名宦鄉賢無祠擇學舍東偏構祠

浙江通志

王確字介夫穎上人嘉靖五年由舉人知餘杭縣有民孫

啓者被誣成獄確爲力辨得減死邑有成化志僅抄本確

特成之邑之有志自此始

餘杭縣志

蔡潤宗號東洛福建晉江人由舉人嘉靖年知餘杭縣卹

民禮士連歲邑大歉小民艱于輸將潤宗寬歲限令得徐

徐輸納舊例糧過三月不解者降二級縣吏持以白潤宗
不爲改去之日士民爲立碑

浙江通志

周之冕字元服湖廣黃岡人由舉人任餘杭縣勸農柔勤
教化凡詞案悉置秘室吏胥無所售其奸催科調其緩急

尤崇獎孝義節烈

餘杭縣志

張應亮字汝龍高淳人嘉靖間由舉人知餘杭縣廉明若
神時倭告警督撫命以戎務監千人以行應亮奏凱而還

擢御史

餘杭縣志

石應潮字思吾上海人由舉人嘉靖年任餘杭樹蔬而食
家繅而衣買水而飲邑爲之謠曰米載雲間白泉沾茗水

清潮聞之曰石使君名與苕水並傳生平之願足矣

餘杭縣志

林大輪字西峯莆田人隆慶間知餘杭縣一意撫循適觀察使徐某巡縣取篆意在得賄吏以此白大輪叱曰觀察之謂何乃以空函進凡數易函竟不納賄

舊浙江通志

濮陽棐號斗台廣德人由舉人任餘杭邑仍積弛之後棐刻意振刷掌錢穀胥吏向年乾沒無忌棐盡法窮治之遺

斃者甚衆行鄉約篤摯一時嚮風尤加意造士陞雷州通

判餘杭縣志

高則巽字汝命號申宇南昌人由舉人任餘杭時張居正政尚操切則巽獨疎法濶網與民休息歲大饑則巽設法

聽民緩輸至解綬以塞漕使譙讓蒙某以匿盜論死賂于
金厲色郤之暇日刻洞霄徑山二志與林大輪共一祀邑
人徐桂爲之碑記餘杭縣志

楊偉號鼈山晉江人由舉人任餘杭歲饑請以預備穀賑
民不待報輒發倉守難之偉曰飢者待哺能須臾緩耶督
學來試偉爭餘杭人材多而取數少請復未汰時額從之

浙江通志

儲應爵宣化人由選貢知餘杭撫循與振勵兼施操凜冰
稟陞涇川州守出境後有徽賈德爵者奉金以治行爵却
之至銷銀帶爲長途貲云舊志

程汝繼字敬承婺源人由進士知餘杭吏憎其威民愛其慈儒學乃法喜寺故址外高內陷特爲高其基重建之陞

南刑部主事

餘杭縣志

戴曰強號兆台蒙城人由舉人任餘杭邑南湖自嘉靖後塘堰漸圯爲奸民盜決漲塞爲平陸佔田者蟠結種植其中天目諸山水驟發湖不能受南鄉十八里之民漂溺幾半而錢塘延被其害日強至悉置豪猾以重法釐舊疆躬率民盡闢湖址縱橫十字培原堤各五里亘湖中旣令土之出有所容而亦藉堤之力以暫緩洪波衝激之勢于是

陸門函堰之制畢周各設壩夫守之而湖復故

浙江通志

馬用錫字晉和晉江人天啓年由舉人知餘杭縣夏大旱
步禱甚勤凡再旬不雨用錫以爲吾方爲民顧帝而尚督
徵施笞扑豈克謹天戒意耶停徵三日而大雨歲遂以有

年餘杭縣志

鄒璘字復齋華陽人崇正間由進士任餘杭縣始至具悉
疾苦見當事首陳胥役追呼之擾乞簡差以蘇疲民復諭
小民遵教令亟輸將毋失上臺恤民至意以故上下咸愛
重之暇日集士課藝省試所雋果璘所素拔者舊志

袁思謙洪武元年知臨安時當兵燹之後闢草萊以開縣
治建官署學校壇廟招撫流亡日以矻矻稱爲幹吏秩滿

陞山西布政司理問

舊志

賈鵬程以洪武七年知臨安敷政循理田野開闢羣民咸

訴訟樂業

萬歷舊志

劉顧洪武三十一年知臨安縣賦役均平民無橫擾陞任

去久衆猶懷之

浙江通志

唐子昌會同人由舉人歷桐廬敎諭天順四年擢臨安知縣不事苛察民有爭訟者呼至案前曉以禮法戒以禍福皆感服曰真吾父母也鼎新學林橋修葺學宮署城隍

廟宇煥然聿新九載秩滿遂占籍臨安

萬歷舊志

方早歛縣人成化間由舉人任臨安御史方嚴聽訟明允

尤重學校敬禮士人創造竹林長橋二座以便往來

萬曆舊志

王翔鳳遼東舉人宏治間任臨安廉而有爲追積年侵欺之稅糧禁豪猾鼎建文廟歷官三載囊橐蕭然百姓戴之

如父母朝覲赴京致仕

嘉靖臨安縣志

王正宗固安人正德十三年由進士任臨安縣俗尚邪術悉禁止之毀淫祠以正人心凡挾持官府牙行私報竹木茶筍糧里多科違例取索之害禁革殆盡尤作興學校修理兩廡齋號及坊表政暇卽詣學講書考文始終不倦去

時行李蕭然陞御史

嘉靖臨安縣志

廖瑜新淦人嘉靖時由仁和丞擢臨安令加意學校纂修

縣志大中丞陳珂廉憲呂和爲之序

舊志

伊敏生吳縣人嘉靖間知臨安縣常以計止礦使邑無礦害民咸戴之

臨安縣志

魏希古臨桂人知臨安縣剛介有爲嘉靖三十四年倭寇

杭州至臨安希古躬親矢石爲兵民先築土垣以資捍禦

民賴之

臨安縣志

劉紹恤安樂人進士知臨安嚴明廉敏吏畏如神尤加意學校拓宮牆濬泮池力增科舉額破格禮士所著有臨安

集

臨安縣志

鄭日近臨安令博學善詩清廉勤敏政修民和百廢具舉

至振興學校敦禮耆碩尤有古循良之風

臨安縣志

戴九元臨安令履任三月愛民如子革除積弊調繁會稽條陳事宜十五件撫按嘉納通行浙省屬邑臨民德之祀

名宦

臨安縣志

黃鼎象南安人以舉人任臨安令愛民重士纂修邑志時

歲歉申請當道題准改折漕糧

臨安縣志

戴祚中號曙海其令臨邑也適文廟頽圯捐俸百五十金率衆鼎新莅任四載士民咸感其德以奸胥解河工逾期降職閩邑思慕刻像學東以祀焉

唐自彩達州人爲臨安知縣杭州失守自彩與從子階豫

逃山中有言其受魯王敕陰部署爲變遂被捕獲自彩麾

階豫走不從竟同死

明史朱大典傳

楊瑛嵩明州人宣德七年爲於潛知縣修舉廢墜政尚寬

平正統四年致仕

萬歷舊志

嵇鋼字汝堅安東人宏治中由舉人知於潛縣愛民好士興學校鋤強梗案無留牘以才名調海鹽兩地之民思之

浙江通志

王子聰字汝達閩縣人嘉靖舉人知於潛縣清勤守官不取一錢而民間利弊隱微畢見邑號爲玉壺冰破大盜鮑邁逼等于天目斬獲三百餘人御史舒汀薦治行第一丁

艱去再補景寧治如於潛兩邑共祀之

福建通志

陳堯典蒼梧人萬歷間任於潛潔已愛民士貧不能試者輒資給之邑南浮溪宜歎孔道也每山水驟漲行旅艱阻

堯典捐俸置渡船

舊浙江通志

郭光詹晉江人崇正間知於潛廉威特著誠獄率多破械歲編丁田皆自衡定催科以漸生平一介不苟常鬻家田

以自給其清介如此秩滿遷湖廣黃州府判

舊浙江通志

繆九鳳如臯人崇正中任於潛下車卽問民疾苦釐剔夙弊先是潛設里役凡官司徵發皆取給焉旣久吏緣爲奸民甚苦之九鳳作放里歸農錄甚便操守嚴介門無私謁

舊浙江
通志

楊梯四川嘉定人崇正中任於潛居官明斷時山邑盜賊竊發梯廉得首惡數人立斃諸市民賴以安

舊浙江
通志

徐弼英德人洪武初爲新城知縣縣治學宮皆其創建撫

民有方

萬歷
舊志

李可立洪武間爲新城知縣建宣聖廟兩廡明倫堂齋舍請貸種食撫民愛士人稱爲秀才李

萬歷
舊志

武楫湖廣江夏人永樂間由進士知新城縣牧御有方四境樂業秩滿士民乞留有詔馳驛再蒞

萬歷
舊志

劉秉夔鹿人永樂間由太學生知新城縣在任祐虎患一

十有八邑之折桂鄉有魚池潭與祥禽鄉鄰界水雖歸聚于潭而順流東下勢不久蓄又南屏隔山田畝每旱不能灌漑秉躬度地形率民夫千名鑿山通道築堰二十餘丈又爲閘以慎防蓄洩仍立堰長司之自堰下流至于龍山下注石頭及官塘路口上下溉田二千餘畝化爲膏腴後人立廟以祀

萬歷舊志

張果長洲人正統間由舉人爲新城知縣凡邑中所辦弓張歷日水夫驢站等料咸減價利民

浙江通志

按萬歷志暨舊志果皆作果今從省志

江湖潼關衛官生成化元年由舉人任新城縣清廉勤政

遇有旱災設法勸相賑濟饑困崇重學校士民頌之

浙江通志

何善知新城邑田畝夾山夏秋雨漲害稼善躬往相度築隄濬溝適歲歉不待報出粟賑飢吏難之曰苟活民吾何

罪公署學校以次興修

舊浙江通志

張鳳知新城縣前政多寬弛乃治以嚴明奸宄咸置之法始病其過而終則賴之

舊志

袁澤知新城雄于才畧悉民之隱令行禁止人不敢欺學校塘堰修葺一新

舊浙江通志

羊修儋州人嘉靖二十七年爲新城令詢鞠必得其情催科亦以次辦無榜掠期限一時豪右歛戢去之日行李蕭

然

縣
新
城
志

范永齡清介質直莅新城縣任不攜家人人不敢干以私貧窮者每優恤之屬倭亂築城計貧民無經費乃藉富豪之寄莊者築其半城成民不知擾

舊浙江通志

廖詔泰和人隆慶初知新城時奉例丈量履畝閭澗盡祛侵蝕今田數加昔而均稅照舊詔之功也

舊志

曹大受字無可麻城人萬歷甲午舉人知新城縣善理滯獄鋤巨憝因鯁介左遷蜀藩長史後擢貴州兵備副使

湖廣

通志

吳徵芳號木峰湖廣澧州人由鄉貢知新城縣才畧敏決

徙學宮濬城濠附郭田沾灌慨焉

新城縣志

孫元衡字湘南桐城人以明經知新城縣縣苦水患元衡濬孝婦小清兩河以殺其勢築隄十八里以捍其衛舉卓

異累擢知漢州知州東昌知府

江南通志

朱轡晉江人宏治十二年由官生知昌化縣廉謹誠篤且

剛介不爲權勢所撓振振在職

萬歷舊志

李洪德興人初由舉人任湯溪宏治十八年調昌化廉明公慎受知上官他邑事多所委任攝餘杭數月以勝安倉勞劇致疾總理淮浙都御史委掣淮鹾不能赴久之疾甚囊橐稱貸以歸民歌謠之以青天稱焉

萬歷舊志

黃昇號與竹番禺人舉鄉試由肥鄉學擢昌化知縣嘗六月祈雨芒履出禱入則焚香私第密禱如外三禱三雨邑中虎爲民害以文禱於神虎去舊志

夏津崑山人舉鄉試嘉靖十一年任昌化令質樸有禮抑

強扶弱柔而能剛

昌化縣志

李燧保定府新城人由監生擢知昌化縣嚴毅清謹有吏

能蒞邑數月庶事整肅

昌化縣志

方鉉鉛山人由監生擢昌化知縣寬厚質實事多節省而

飭治學宮意獨拳拳焉後陞昆陽知州

昌化縣志

馬逢伯六合人嘉靖中知昌化首葺文廟建學齋邑役三

倍錢塘乃懇言上官蠲二大戶及會江驛庫等役又申除

糧道例扣銀并冊書飛灑諸弊歲省糧數百金有爲盜殺

于路者逢伯爲文禱于城隍遂獲真盜舊浙江通志

胡芳上海人嘉靖中任昌化知縣敦樸恬靜尤勤勸課化

縣志

蒙學之南海人嘉靖中任昌化知縣恤民養士有古循吏

遺風昌化縣志

華文南無錫人嘉靖中任昌化知縣諳治體悉民情詳革

會江驛就役抵解銀兩及除本縣遞送夫馬浙江通志

按舊志作文甫今從省志

周易字少東句容人嘉靖中以鄉薦知昌化縣嚴毅明敏剖發如神上官以其廉幹兩委海寧縣昌化民爲之立望

來亭

昌化縣志

方恂桐城人由舉人知昌化縣清介嚴毅胥役畏威而里
遁樂其寬均田平役民以不擾

昌化縣志

周洛都字雲麓臨淮人由舉人令昌化練達有能政曾新

縣治及諸城堞倉庫之圯廢者

舊志

岳方南充人以大理評事出知昌化縣時礦事擾民方力
請上司議將門市額稅永爲規則作礦息事寢民賴以安

昌化縣志

余猶龍字敏初順德人由舉人任昌化專以惠恤民民有爭訟諭以忿恚可忍當思縣門不可入訟者感悟悉罷去每農月課勸農蠶俾婦女毋往廟寺遊觀邑野清靜

昌化縣志

顧謙服字民服天啓年爲昌化令課農桑興學校值歲饑

多方勸諭設糜粥飢民賴以存活里民解公帑抵府爲庫

吏所蝕藩司嚴檄督縣謙服抗辭陳守請逮吏嚴訊守恚

曰知縣何不代訊耶謙服受命請刑具立鞠于府廳傍卽

從吏家追獲原帑解司咸服其神

浙江通志

徐一夔字大章天台人工文與義烏王禱善用薦署杭州

教授明史文苑傳嚴爲軌範以身率之名入史館纂修元史詔

制靈谷寺碑稱旨賜蟠龍綵綬再莅益申教條一時多所

成就

舊志

蔣良輔閩中人洪武年任本府儒學教授學規嚴整課試有方勤于教廸造就生徒居多知府虞謙重之薦于朝陞給事中擢吉安知府

舊志

莊元貞字若虞華亭人以進士任杭州教授重聽然開率和易以禮義導人嘗言曰師生務在切磨今典禮鐘律頗有清訛高才博學者幸日過齋軒以匡予不逮其中懷誘人多類此

舊志

蔡銳字抑之南京留守衛人嘉靖中由舉人知河南通許

縣以抗直忤上官謫杭州府學敎授爲人方毅端嚴得師儒之體談經授藝皆令歸諸身心諸生嚴事之守已廉貞雖生徒歲時常饋不受一生以私奸敗行持百金求解立白于督學使者黜之又一生爲父訟不孝銳曰是不難黜恐爾父子中悔奈何乃召生立庭下聲大義責之父子俱泣謝而去

浙江通志

景星字德輝餘姚人洪武中以儒士保陞杭州儒學訓導其學特粹于經尤長于春秋弟子承指授者多去取高第至久猶沾溉焉

萬歷舊志

胡粹中會稽人洪武年任杭州府學訓導以身爲教以勤

爲功文章政事兼而有焉

舊志

王士和字希節侯官人正德丁卯舉人錢塘敘諭萃諸生日課文講藝親爲刪定家故饒豐酒饌與諸生會或貸金錢不責償諸生感奮

舊志

李德陽淮安人歲貢生敘諭錢塘謙和愛士旁邑諸生慕其高懷亮節多從之游視富陽篆嘗于署中聞廟山鐘聲頗異乃親往叩擊清越以長餘音似在鐘簴間曰此桐材也未遇中郎淹抑久矣取歸命良工琢以琴自謂不減焦尾響泉後竟以此得謗德陽欣然抱琴還淮南

錢塘縣志

聶大年字壽卿臨川人正統末薦授仁和訓導遷仁和教

諭景泰六年薦入翰林未幾得疾卒始尚書王直以詩寄
錢塘戴文進索畫自序昔與文進交嘗戲作詩一聯至是
十年始成之大年題其後曰公愛文進之畫十年不忘使
以是心待天下賢者寧復有遺賢哉直聞其言不怒亦不

薦明史
本傳

李璧字白夫武緣人正德丙寅以舉人任仁和教諭貌古
心淳學博行謹篤好古禮樂律天文星歷之學詣太常求
觀樂器審音中律欲知象緯至以靈臺郎爲師討求三禮
講授生徒在仁和九年端重不苟部使者欲移石經抗顏
執爭竟莫能奪葺學宮賑貧士皆捐己貲爲之諸生感慕

其德無不興起爲人天性孝友內行完備嘗以心爲嚴師所交皆海內英賢尤善以禮匡率後進士林中至爲之語

曰白夫先生今之胡瑗也仕終南京戶部員外郎

萬歷舊志

高宏仁字德周順德人正德間仁和訓導士有餽者從容

辭曰吾居是職兢兢以戶素爲懼何復受此爲察諸生極貧者或稍賑卹之

舊志

曾昶邵武人永樂間任海寧學敎諭爲纂輯邑志蓋自宋圖經以後昶始修之

舊志

羅能吉水人正統甲子任海寧學敎諭課士分三等雞鳴而起夜分不倦時師道嚴士皆絃誦於泮宮倡率不倦明

代以儒官列俎豆者能爲之首

海寧縣志

蔡祐晉江人正德四年任海寧學敎諭忠誠恭謹正直光
明端師儒之範峻禮法之防陞湖州敎授

海寧州新志

鄭日休字舒軒閩縣人萬歷初任海寧敎諭旬試月會尤

重實行諄諄勸勉見士以非公溷有司者召而訶之或遭
枉抑必力爲白訓導沒于官貧不能喪日休爲之殮他若
賑貧士婚葬輒割俸予之

舊浙江通志

張小泉逸其名任海寧學留意風教議祀董濤于鄉賢其
孫虬祥貧不能舉小泉呼集諸士呈請當道奉主入祀一

時競高其義云

海寧州新志

趙維寰字無聲平湖人任海寧教諭先是師道日下士習
日卑維寰至首遵會典申議正體統以振師範學憲重之
著爲式邑令謝紹芳有意修輯縣志屬維寰秉筆甫傳檄
而浮言間之紹芳憂去維寰慨然綜前後所搜採者彙爲

一編曰寧志備考

舊志

閔自寅字人生湖州烏程人任海寧教諭家世鼎貴退然
守儒素貧生執贊進必力辭往者醫役狎諸生相爾汝背
輒呼其名寅聞之赫然怒撻之曰若輩無禮敢名吾諸生
耶由是相戒歛戢遇邑中大利弊必以告令長人多陰食

其福者

舊志

李完號缺齋德化人嘉靖十三年由太學生任海寧訓導無忝師道遷清縣教諭謝德聰爲撰去思碑配祀名宦

舊志

李培字雲麓嘉興人由明經任海寧訓導招徠士子讀書泮宮令門斗執繢供洒掃給使令朝夕談古論今引進來學戊申歲祲改折減漕寧不蒙折適其故友姚廷尉來欵留齋中發當道十三札亦允折漕民賴以安遷新城教諭

海寧州
新志

朱瓘莆田人宏治二年以舉人任富陽教諭啓廸多士名

賢輩出祀名宦祠

舊志

杜子新福寧人正德二年由舉人任富陽教諭振興樂育
繼美前人經學文章之盛一時莫比

富陽縣志

方國儒字道醇歙縣人四歲失父奉事母以孝聞天啓元
年舉于鄉

明史本傳

崇正二年任富陽教諭朝夕課士不倦後

知保康縣流寇薄城死之

舊志

楊正福建人宏治十八年由序貢任富陽訓導誘掖多方
士類樂之儒行文風日趨于盛追論風氣者必以正爲首

富陽縣志

趙潛江陰人萬歷二年以歲貢任富陽訓導五年陞本學
教諭以正律己以道訓士學校嚴肅體統整飭迄今人士

思之

富陽縣志

曹師曾字約我宜興人天啓六年以貢生任富陽訓導講學課藝却贊周貧獎俊髦旌節孝士論重之

舊志

林誠通號與白南海人由舉人宏治十八年爲餘杭教諭取與不苟雖束修常禮一切却罷生徒有貧不能自力者量助之以勉向學嘗捐己俸建清雲樓于學之東南

舊志

李鵬舉字起南歸善人嘉靖中由舉人任餘杭學教諭端方宏毅邃于理學常以身心性命誨諭諸生人皆感動潔廉恬曠一介不苟每捐己貲以惠貧士改建學宮申明教條親授諸生課業嘗以士相見禮使之習肄置善惡二簿

俾知懲勸士皆彬彬有興未三年以憂去後任台州府同

知風介益勵請託不聞海內稱爲端士

萬歷舊志

陶奭齡字石梁會稽人由舉人天啓四年任餘杭教諭往任是職者多患貧奭齡獨以道誼自振進諸生論經術不

倦諸生喜人自以爲得師

舊志

鄭循初字子初莆田人正統十二年鄉薦授餘杭訓導嚴條約以身先之祁寒暑雨必衣冠端坐爲諸生講解竟日無怠容仕終秦府右長史

萬歷舊志

官伯齊任臨安教諭臨邑科目乏人伯齊嚴加考課捐資以給紙筆供饌文體大變自此科目日多

舊志

顧說無錫人嘉靖間以舉人任臨安諭居官清敏文望大
著訓迪士子寒暑不怠每遇孤貧不吝資俸助給而于好
修之士尤加鼓舞砥礪一時文風大振時泮池壅塞學宮
傾圮捐資修築煥然一新解任之日士民感戴從祀名宦
舊志

來遇龍爲臨安教諭時學宮傾圮泮池闊塞毅然以爲已
任捐俸作倡顏應奎門曰高山仰止賈宮曰太和元氣公
署曰蛟龍雲雨泮池曰化龍皆刻石爲之仍于泮岸遍植
桃李池堤東構文昌閣景物之盛異于昔時舊志

過俊民無錫人臨安縣訓導勤于課士丕變文風時亂離

而文廟祀典無缺于時後遇難殞身原籍現祀鄉賢

臨安縣志

沈在宥字元峩長興人崇正四年由舉人任於潛教諭課士之暇輒登高度形勢見邑南諸山奄伏不振捐俸創首建塔山嶺曰祈祥後科第稍振皆如在宥所計度云

舊志

馬彥周洪武初任新城敎諭時條教未備彥周準古立規不詭隨元季之陋人文賴以興起

舊志

張浩巴陵人任新城縣學敎諭生員屢次詣闕保留凡在任二十九年募塑聖賢像砌泮池作櫺星門一以公平絕

去已私

成化舊志

陳希登字伯龍正德中爲新城敎諭因廟學傾圯捐俸倡

義募富民重爲修建歷任四載兩典文衡登嘉靖丙戌進士舊志

唐堯儒字惟真嘉靖十六年爲新城訓導耿介不阿交遊不汎識者期以遠大爲力任遷學遂致浮言去官士論惜之舊志

王玳海豐人嘉靖三十五年任昌化敎諭甫至翔議改明倫堂于文廟之後舊志

李奎祥字梅賓貴池人嘉靖間任昌化敎諭課士如子弟捐俸建尊經閣于明倫堂左舊志

張吉壽州人萬歷中昌化縣學敎諭德性醇謹敏于課士

曾手植桂栢數十株蔚然爲文廟光

昌化縣志

按前卷有張吉餘千人正德中官運使與此係兩人
章允升會稽人舉鄉試萬歷中昌化縣學教諭有文行委
按各鄉賑濟分授有法餘悉封還縣庫士人高其風節

昌化

縣志

周鐸江西南昌人以舉人任昌化縣學敎諭捐修學舍加
惠貧士士有被抑枉者爲申釋後擢仙遊縣令終副使

昌化

縣志

屈起元吳江人崇正十年昌化縣學敎諭公正樂易視諸
生恩義並至曾置田及祭器典籍于學宮甫踰年卒士咸

心喪之

昌化縣志

韓鼎新字又銘江都人崇正間任昌化教諭值徽郡寇亂
躡入官舍苛索金帛欲強繫以去自刎死

昌化縣志

徐然字元明石門人任昌化訓導撫然曰昌邑介在吳會

文物日開獨理學未精耳月率諸生講學明倫堂特發良

知秘旨

舊志

徐寄剛正統間爲錢塘丞在職九稔勞心拊字以廉公著
稱滿去民乞留得增俸復任

萬歷舊志

褐銘德南雄保昌人由監生任海寧縣丞治民無擾爲政

有方績葺學校陞寧國知府

嘉靖海寧縣志

閔乾江西浮梁縣人正統元年舉賢良方正爲海寧縣縣
丞御事簡捷職司清軍甚有方畧秩滿父老擁道送行陞

漳浦縣知縣

萬歷舊志

陳嘉長樂人宣德七年爲海寧主簿縣與海寧千戶所錯
處軍縱官馬戕民稼及巡夜生事嘉乞廵夜自著有司官
馬害稼戮傷勿論由是民庶獲安

成化舊志

沈玉璋字九山永定人嘉靖間以貢授海寧簿寧無城郭
人鮮知兵玉璋至以職司邇逋勤于訓練後倭寇掠境親
率東倉兵捍禦邑賴以全

福建通志

溫純寧都人隆慶六年任富陽縣丞徵稅有法幹理優裕

署縣令事多無過撫軍旌之日催科不擾持守不苟一邑

號良吏云

富陽縣志

譚瑚宏治末年任富陽典史病南京之額班申頂外縣長夫爲慮深遠處下僚而有惠民實政亦人所難

舊志

邱子強永豐人洪武十八年爲餘杭丞簡重有威吏非押文書不得升廳公庭肅然示民以信賦稅科差與民期約曉以利害量力取辦未嘗給帖遣吏胥虐鄉里

成化舊志

李發胙城人洪武年爲餘杭丞剛明廉直教民有方有父子異居分財者以五教五刑勸善懲惡之道諭之民感悅

而化

成化舊志

東鑄福建浦城縣人由監生爲餘杭縣丞器量有餘不事
褊急然處斷公事教法不阿或有承委無不竭盡心力唯
以不勝厥任爲慮居二年以疾卒妻子守柩不能歸葬士
大夫白其事于當道資脚力口糧百金以行民至今思之

餘杭縣志

陳祥福建永安人由監生授餘杭主簿莅官清慎境內橋
道圩岸特加修理不歛民財而事自辦憫孤窮好賢士衙
地閒曠嘗親自灌蔬以示子弟民至今思之舊志

羅謙亨洪武元年爲臨安縣丞公以決事廉以守身而尤
濟以勤幹時稱賢佐萬歷舊志

張昇宣城人永樂間爲臨安簿加意學校勤課農桑且廉

幹有稱陞新淦知縣

萬歷舊志

唐良臣臨安縣主簿情性恬淡丰裁整肅剔釐漕弊殆盡
合邑畏威懷德後以子大章貴贈吏部侍郎從祀名宦

臨安

縣志

饒賢湖口人景泰間爲臨安縣典史廉介有志撫誠幹通

達遇民多以惠愛不妄施鞭朴陞處州府景寧縣丞去之

日黎老童稚無不嘆慕饒君者

萬歷舊志